

عرفني صدفة
في الأتوبيس

الكتاب: عرفني صدفة في الأتوبيس

تأليف: آلاء مجدي

الإخراج الداخلي: القسم الفني بالدار

تدقيق لغوي: قسم المراجعة والتدقيق اللغوي بالدار

تصميم الغلاف: محمد المصري

الطبعة الأولى: 2022

رقم الإيداع: 2021/30961

الترقيم الدولي: 7 - 10 - 977-978

دار إضافة
للنشر والتوزيع

ج ٢٠٢٠ ع
الإسكندرية

ج ٢٠٢٠ ع
الإسكندرية

Email: mazagelkotob@gmail.com

Mobile: 01024541339



مزاج الكتب
للنشر والتوزيع

لا يسمح بإعادة طبع الكتاب أو أي جزء منه أو تخزينه
في نطاق استعادة المعلومات أو نقله بأي وسيلة من الوسائل
سواء التصويرية أم الإلكترونية أم الميكانيكية، بما في ذلك
النسخ الفوتوغرافي والنشر على أشرطة أو سواها وحفظ
المعلومات واسترجاعها دون إذن خطي من الكاتب أو الناشر.

آلاء مجدي



عرفني صدفة في الأتوبيس
غير مصرح للكبار

المحطة الأولى

انت تشبه الكابوريا
لما تجري تستخبي
م الزعل تدفن دماغها
جوا رملة دافية صافية
برضه تشبه الكابوريا
لما تمسك قرصتها
م الغضب تفتح سنانها
بس انت والكابوريا
فالحنان ملكمش زى
قلبكم أبيض وصايف
حبكم يملأ الوجود
ضحككم مالي الوشوش
اه منك يا كابوريا
عاملة زي وتشبهيني
حتى برجى الفلكي منك
برضه برضه زى اسمك.

عرفني صدفة فالأتوبيس

فكلمني كثير عنه ، وعن يومه

وعن شكله زمان لما

بيعمل شعره لسه كانيش

وقالي كمان عن أصحابه

وعن أهله

وعن عجلة طفولته زمان

عن المدفع بتاع رمضان

وفي البلونة مستني

عشان يسمع صوت الاذان

حكالي ، وقالي أنه وحيد

برغم العيلة واللمة.

وقالي هناك حبيبة سبتني

ف الضلمة ...

فضل يحكي لي ، وانا اسمع

بأنه كثير مكنش لطيف

وإن الدنيا متساوي ،

وقال انه بيتمنى

يحب الدنيا من ثاني

ويلقى نصه الثاني

تكون تشبه حاجات فيه
تكون، وتكون، وتكون، وتكون ...
ساعتها قولت يا ريت انت تكون قدري
أكون أنا نصك الثاني
تكون تشبه لأحلامي
لمست حاجات كثير جواك
عنيك البني فيها كلام
عايز يتقال .. لكن خايف
من الضلعة وم الدنيا
لا تبعدنا ويبقى يدوب ما بنا سلام.

.....

مطول شعرك يجي شبرين
ودقنك دى مقاس صابعين
وعينك جوا نضارتك
وسبحة نايمة في رقبتك
وساعة ماسكة على إيدك
ودبلة حافظة ما تسيبك
وكرسي في قهوة باسمك
وناس عرفوك عشان رسمك
وناس فارقوك عشان حلمك
وغيرهم ناس كانوا ضدك
في اى كلام خرج منك ..
متستسلمش للموجة
ومتسلمش للهوجة
وعيش عشان تكون إنت
بطل لرواية ليك إنت ...

.....

سيجارتك ولايك

وفنجان قهوة سادة

تشد بضمير

وتنفخ بذمة

تقلب صور

تفتح قديم

قلب يا خويا

قلب كمان

ما هو اللي باقيلك

صور والسلام ...

.....

أنا فعلا مغرور جدا
علشان عايزك ليه لوحدى
وبقيت انسان تانى بفضلك
من كتر عمايلك ، وغيابك
مش معنى انى بعثبك دايماً
أننا نتخايق ونفارق
ولا معنى انى بقولك لا
أن انا سي سيد وبقاوح
انا عارف أسلوبى ده غلطى
وأن انا عصبى ، وممكن اضايقتك
بس انا بعمل كده من ضعفى
من خوفى عليك وخوفى منك
انا خايف م الدنيا عليكى
فبعملك كده غصب عنى
وبخاف منك علشان عارف
ان كرمتك غالية عليكى
مممكن بسهولة تروحي ماشية
علشان جرحت كتير فيكى
بالرغم الحب فى قلبك ليه
لكن والله مش بأيديا.

إرتبطى بكام ولد ؟
مارتبطتش بولا ولد ..
دورك أنت يلا رد
كام بُنية جرحت فيها ؟
عارفة شعر رأسك كام !
عدى عدى .. كده تمام.

.....

متستسلمش

حياتك رايحة فالنازل
وصورتك فيها مية خادشة
حبيبك صوتها راح م خوف
وأملك كل يوم ييموت ...
متستهونش وتسلم
وترجع تاني تتندم
صحابك من زمان شطبوك
وشغلك والمدير طردوك
وجسمك م التعب موجوع
وقلبك م العذاب مخنوق
وكل دقيقة فاضلك
من الدنيا بتندهلك
عشان تصحى
وعقلك رافض الفوضى
ويترجى مشاعر قلبك الساكنة
عشان ترجع ...

ولأن الدنيا بقيق زحمة
والناس فعلاً عاملين دوشة
بما إن حياتي فيها ربكة
وأعصابي أصلاً مرتبكة
قررت أهاجر للمريخ
أهو كوكب أحمر بس لطيف
مفهوش لخبطة شقلبة تهيس
ولا فيه إشارة حمرا وناس ماشيين
ولا عالم فاضية بتقول بيبس
أو ناس مطحونة مش لاقية العيش
الأرض خلاص مسحولة يا ناس
عندها أوزون جالها ارتجاج
أنا أروح أصحابلى فضائية
هادية أمورة مش نكديه
ونروح نتمشى فالمرخ
الكوكب الأحمر منا قولت لطيف
نضرب غوطصين أو ناخذ تان
نشرب جويين ... وكله تمام.

.....

يقولوا زي ما يقولوا
محدث فاهم الدنيا
مجرد بنت حبيتها
وخبثها كثير فيا
فخوفت عليها من نفسي
وخوفت عليها م الدنيا
ومنكرش .. ضعفت كثير فقوتني
وخونت كثير وسامحتني
أنا مش شخص حبيته
أنا دنيا وبتعشها
أخوها أبوها وصاحبها
حبيبها اللي اختفى وسابها ...

.....

وحشتيني يا نصي الحلو فالدنيا

يا اجمل بنت فالجنة

وحشتيني

ولسه بشوف خيال طيفك وانا بحلم

وبلمح شالك الاسود

مغطي جزء من شعرك ...

وحشتيني

وكنت جبان ولسه جبان

عشان فرطت في حياتي

وسبتك من بنين ايدي

عشان حبيت اكون راجل

واسف اني معرفتش ...

وحشتيني

يا ساكنة في قلبي من جوا

واخذه معاكي روح قلبي ...

ياروحي انسيني منفعكيش

انا كل ما اشوف اسمك
قصادي عنيا بتدمع ...
بكون طفل يتيم وحزين ...
انا عارف اذيت فيكي
وبعتك كل مرة رخيص
دي مشكلتك ليه دايم قلبك لسه نضيف
ليه دايم كنتي حطاني
في حنة عني لسه بعيد ...!!
ليه كنتي شايفة اني نضيف
وانا انسان ضعيف وخسيس..

.....

دكتور اتجوز دكتور
خلفوا كتاكيت صغونة
كبروا الكتاكيت
وطلع شنابات
والصورة اكتملت بأعجوبة!!
دكتور علان .. دكتور ترتان
يحرصها العين دكتور سعاد
البيت بقى اشبه بعيادة
دكتور فالأوضة ، وفي الصالة
دكتور فالمطبخ بالطاسة ..
حاسوا الكتاكيت إن حياتهم
لازم تبتي وياه شريكهم
راحوا الدكتور والدكتور
وقفوا وقالوا لأ مش معقولة!!
الدكتور في بلدنا له قيمة
لازم يتجوز دكتور
علشان العيلة والشكليات
علشان خاطر عمو عماد
ف يروح يتجوز دكتور
ويجيوا كتاكيت صغونة.

ويجي ميعاد النوم بليل
وبفضل أبخلق أنا فالسقف
أشوف الحيطه آخرها فين
وأشوف اللمبة ليه مترقصش ؟؟
بلاقي دولابي متكركب
هدومي خارجه من جوا
وخالفه تنام هناك ع الأرض
كتب مرمية ع الكنبه
شاحن مربوط في أيد المج
ساعة عقاربها مبتمشيش
وواردة حزينه في إزازه
وصورة تعيسة فالبرواز
بتضحك ضحكة مصنوعة
وشيش وستاره متخصصين
وشمس لجوا مبتوصلش
وأنا في سرير كبير جدا
ببص يوماتي أنا فالسقف
وبسأل نفسي بس سؤال
ليه اللمبة دي مترقصش ؟

.....

بنستخبي م المشاكل والهموم

جوا الهزار

تلبس إنت وش تاني

المهم بيان هزار

نعمل إن الدنيا حلوة

والحياة أصلاً لونين

مرة غامق

مرة فاتح

مرة لون بين البنين ..

قولت هنسى

قولت تنسى حبة الهم الثقيل

قولت فاكر

قولت عارف إن ده قسمة ونصيب.

.....

أنت عايز تبقى ليها
بس خايف م المقارنة
كل ما تقارني بيها
باخد أنا عشرة % عشرة
إلا حاجة واحدة بس
ببقي فيها واحدة صفر
حب عايش جوا قلبك
ليها رافض يبقى ليه.

.....

وصحيت الصبح على رسالة
من شركة فودافون كالعادة
أصل انا سالف منها تملي
ومبسدش ديوني نهائي
سيبك من كل اللخبطة دي
كان في رسالة تانية مبعوتة
من رقم انا كنت زمان حفظه
مكتوب فيها ازيك يا أحمد
انا اسفة انا عايزة اطمئن ..
اخبارك والصحة بخير
ويا رب تكون لسه فاكرنى
والبعد مغيرش ذاكرتك...
فجأة حسيت انى فتادى
وبلف تراك ملعب كامل
ضربات قلبى حالفة متهدى
وعروقى الدم هرب منها
مبقتش أنا عارف اتصرف
إزاي لسه ياناس فاكراني
مش كنا فارقنا من فترة

وبعدت وسبتلها حياتها ...
هكذب تانى وأفضل اقول
انا من غيرها حياتى تمام
وانا اصلا مش بعرف انا
يمكن نسيت كدبى عليها
أو سمحت فى جراحى انا ليها
أو يمكن حسست بعذابى
او حب العمر اللي خدعته ...
ومسكت موبايلى عشان اكتب
منشت طويل كله اعتذارات
وكلام صادق طالع م القلب
مع كلمة كتير محبوسة جواه
ويدوبك بضغط إرسال
ولاقيت فودافون بتفكرنى
أن انا سالف ومسدتش.

.....

بنغمة حزينة مكسورة
يرن موبايلى بيها الصبح
بنمرة غريبة مجهولة ..
برد بنص عين نايمة
وغارق جوا أحلامي
ورعشة في جسمي م الخضة ..
مكنتش عارف أتأكد
ده واقع ولا شكله خيال
ياريت تليفوني كان صامت
وفضلت عندي راحة البال.

.....

المطمة الثانية

مش عايزة أتجوز
ولا دكتور ولا طيار
ولا سباك ولا فران
ولا شقة كبيرة ولا عربية
أو شقة هناك م الجمعية ..
مش عايزة أتجوز وأنا حرة
مش هقبل أكون سلعة رخيصة
وأتزوق وأبقى عروسة عيرة
مش عايزة الست أم عصام
تسألني سنك بقى كام ؟
ولا طنط اللي مقابلة لبيتنا
تصغرلى وتقول يا حيلتها ..
أنا عايزة أتجوز بطريقتي
لما نصيبي يقول يا حبيبتي
مش علشان سني زاد تكة
يبقى جزائي أعيش مكتئبة .

.....

نسة فاكرة!!

فاكرة أول يوم دراسة وأنتي حاسة إنك كبرتى ...
فاكرة عادل ابن جاركم لما كان دايماً يعاكسك ...
فاكرة لخبطة الأهالي عملي ولا أدبي أدخل ...
فاكرة سهرك كل ليلة فى مذاكرة الأخ عنتر ...
فاكرة قلقك يوم نتيجتك، وأنتي خايضة تفارقي حلمك.
فاكرة أول يوم تروحي دنيا تانية فى جامعة تانية..
فاكرة طيبتك جواه قلبك فاكرة خوفك لا كسوفك
فاكرة حاجة ضايعة منك..

قول برأتك أو طفولتك هو شئ ضاع من ملامحك...
فاكرة شمسك لما تسطع وياه ضحكة حلوة صافية !..
فاكرة كل حاجة فيكى بس ناسية ازاي هترجع.

.....

كنا لسه صغيرين
شعبة علمي وشعبة أدبي
كانت الأحلام حياه
تنتهي قبل بدايتها
كنا ليه مستعجلين
إننا نبقي كبار
للهوم متشوقين ..
جامعة شلة الصحاب
المشاكل والحياة
أكبر الهوم ساعته
ليه بنصحى الساعة سبعة.!
رحلة طالعة إسكندرية
مين هيقعد الناحية ديه ؟
مين ملخص المسائل
مين معاه ورق الحاجات ..
مرت السنين بسرعة
واكتشفت انك بعيد
والحياة لسه هتسلم عليك
ليه بنستعجل ونكبر ..!!
وما نكبر

تبقى عايز ساعة واحدة
في حنة واحدة
وياه شلة الصحاب متجمعين
واحنا لسه صغيرين ...

.....

زى النجوم
ساكنة بعيد
ضوءها شديد
واللامعة فيها منورة
زي النجوم
منها كثير
لكن اكيد
في واحدة منهم مشرقة
تفضل بعيد
وتقول عجيب
كل ما قرب
عشان اطولها
بكتشف اني بعيد
وان جيت قرب منها ثاني
وبزيادة
بلقى نفسي بقيت وحيد
زي النجوم
دي بعيد اوي
والقرب منها مستحيل...

زى العيال بزعل أوام
ابعد واخاصم بالأيام
زى العيال بفرح أوام
وإن جيت تصالح بتبسّطت
وأنسى اللي فات ..
زى العيال العشمانيين
في لعبة حلوة يوم العيد
وإن جيت أشوفك أتخطّف
م الفرحة أجري وأتكسف ..
زى العيال بحتاج لحضنك
بحتاج لطبطبة الإيدين
بحتاج ساعات زغرة عينيك
زى العيال م الوحدة أخاف
م الدنيا أبعد وانكمش
زى السلاحف أختفي ..
زى العيال في الحب طفلة صغيرة
أضحك وأرقص والفرحة تبقى مطولة
وإن جيت عليه بنكسر
وأفضل أعيط زى العيال ...

.....

كان دائما يقف من بدري
في عمارة مقابلة لعمارتنا
كان يفضل يضحك ويصفر
علشان يلمح ضحكة عادية
كان اول مانزل فالشارع
يفضل كالمخبر مراقبني
كنت افضل اطول فالشارع
على امل انه يقول ازيك ؟
ما اهو اصل حمادة ابن جارتنا
طول عمره متربي في بيتنا
بس عمرنا ما اتكلمنا
اصله مصاحب الواد اخويا
وانا كنت البنت الدلوعة
وكبرنا اوام واتخرجنا
وحمادة ساب بيتنا وحتتنا
وانقطعت اخباره عن بيتنا
معرفش اتجوز او هاجر
كانت ايام و خلاص راحت
معرفش انا ايه كان فاكرني
بحمادة وبطنط جارتنا.

كانت الضحكة تملي

مالية وشك الحزين

كانوا يمشوا يقولوا عنك

الحياة فاتحة دراعتها

ليكي عكس ما قافلة لنا

ابتسامتك أو شقوتك

فيكي شيء يمكن غريب

ناس شافوكي .. حاسوا فيكي

حلم ضاع وياه الزمان

قالوا عنك دي ابتسامتك

تملى كل الكون جنان

شافوا فيكي نص مشرق

طاغي ع النص الحزين

نص حاجة في كل حاجة

واحدة عايشة بنص قلب ...

.....

ذكرياتنا ليه بتبعد
كل ما الواحد بيكبر
ليه ندمع لما نلمح
صورة من صاحب قديم
فيها ضحكة لسة صافية
وياه كلمتين بجد
واحدة منهم للأبد
تحت عنوانا القديم
جمب كلمة يا صديقي
لما كنا أصحاب بجد ...
ذكرياتنا حاجة فاتت
لما نفتكرها نضحك
والدموع تملأ العيون
والحنين جوا القلوب
يوجع الجرح القديم...
كل واحد منا

جوا منه شيء قديم
صوت لجده بينده
صورة من حبه القديم
لمة الصحاب والناس
قاعدة حلوة في يوم خميس
دي قرييتي بنت خالتي
ودي نجاة بنت الجيران
دي هدية في يوم نجاحي
وده قميص فاكرة كمان
ذكرى قادرة تصحى جرح
أو ببسمة تمحي شرخ.

.....

ينفع أبعد .. بس أقرب
خايفة أقرب.. بس تهرب
كل مرة تكون قصادي
يبقى شكلى حد ثاني
ببقي واحدة جوا واحدة
واحدة خايفة
وواحدة عارفة أنها ممكن تسبب
واحدة عايزة تبقى لسة
واحدة شايفة شيء هناك ع الجبين
ببعد .. أقصد لما أقرب
بنسى نفسي فى يومها وأهرب.

.....

المطمة الثالثة

للأسف لاقين لبعض

هو برضة نسخة منك

ساب حبيبته عشان يجيلك

فهم الناس والصحاب

إنه عاشق نور عينيكي

قال لكل الناس دي بسمه

ع الوشوش ترتاح وتُسكن

قال كلام وكثير قصايد

ليكي زى ما قال لغيرك

وعدك ..

إن طول العمر جمبك

والعيال السبعة منك

وإنتى برضه نسخة منه

فاكرة إن الحب لعبة

روحتي صدقتي الحكاوى

عن حبيبته اللى سبها

قلتي يلا مسيرها تنسى

المهم تسيب نصيبها

روحتي بعتي حبيب قديم

ع الورق يكتب كلام

ليله زى صباحه اصبح

يفتكروعد السنين

وأنها اول حبيبه

قلبه دق فى مرة ليها.

.....

تقريباً كده مش متفقين

دايماً نتخاتق ونفارق

وإن قولنا خلاص إننا صافين

نرجع وكأننا بنعافر

ده لو احنا في يوم قاصدين نبعد

كنا بعدنا زمان وإرتحنا

مش ساعة نتصالح وساعات لا ...

حوارتنا بقت كلها أَلغاز

مش عارف مين فينا المظلوم

ولا مين بقى ظالم للأيام

أجي أبعد أخاف لأكون جارج

وإن جيت أفضل ببقى المجروح ...

.....

لسه سيبك لأ مخصصك

لأ بيتلخبط في اسمك

لسه تاني يفهمك

إنه حب الدنيا بيكي

لسه بيقولك حكاوي

وإنتي تاني تصدقيه

لسه ساذجة زي ما أنتي ..!!

فوقي هو محبكيش .

.....

تقدر تقولي عاندت ليه
لازمتها ايه تبقي المسيطر فالكلام
تأمر وتتهي والسلام
البنـت ابسط من كده
عايزاك بسيط وسط الالم
عايزاك جدع وسط الحياة المتعبة
عايزاك حبيب مالي حياتها بالحنان
غلطوا اللي قالوا
مش مهم الاهتمام
غلطوا اللي شافوا
ضعف البنـت مشكلة.

.....

المائل يعدل فالمائلة

فتميل وياهم مواجعهم

وتميل مشاعرهم فى قلوبهم

من بعد ما يعدلوا احساسهم

فيميلوا على بعض فيتعدلوا

من بعد الدنيا ما خدشتهم

فالحب يذقدق فى حياتهم

والمائلة تحس بشقوتها

وتسيب المائل اللى عدلها

وغرور جواها يملأها

فتدور على واحد معدول

على أمل الحب المفقود ...

.....

بيننا مليون اختلاف
بس برضه بتشبهيني
بيننا حاجة معقدة
والامور متشبكة
بس انت نيني عيني
انت حتة مكملاني
رغم كل اللخبطة
انت نور الشمس اللي ..
في ليلاي تنويره
كل حاجة وعكسها
كل حاجة وشكلها
بس لينا نقطة دايمها
قادرة تمحي اي فرق
نقطة نتلاقى فا ننسى
اننا مش زي بعض
نفكر بس ساعتها
اننا قلب اتقسم
نص ليه ونص ليكي.

ايوه شافها لما سابها
ساب سننها تمر فيها
شاف حنينها اللي فى عنينا
لما ساب ماسكة اديها
عائشة جوا سنين ماضيها
ماضى علم جرحه فيها
خان ضميره لما باعها
لما بص فى نينى عينها
حس نبض قلبه فيها
حس ظلم نفسه ليها
فات حبيبة الخير ماليها
راح و ودع حبه ليها.

.....

بعد معشمها انه شاريها
وأنه هيجى يوم يتجوزها
وأن حياته صعبة من غيرها
سمعها كلام ولا فى الاحلام
وحكلها كتير ولا فى الافلام
بعد ما حبيته واتشبكت
فى حباله الدايبة واتخنقت
وعذاب وآهات والم وفراق
وتدور ياما ومتلقهوش
وتقول الوعد محققهوش
سابها يا حرام .. المسكينة!
سابها تقاسى فى دنيا غريبة
سابها وآهو راح لكثير غيرها
سابها متعشمة فى حبيبها.

.....

بعد ما فهمها أنه حبيبها
فلسعها وسابها في وحدتها
بعد ماخذ منها رقم بيتها
وهو قرب يدخل دنيته
بعد ما طلوعوا فناجين الشاي
قالها معلىش .. سوري مش جاى
وسلام فسلام .. باى باى باى باى
بعد ما اتصدمت واتفجأت
اتخضت حبة وارتبكت
حاسة بدموعها محبوسة
ولسانها بعقدة مربوطة
واغسطس فجأة قلب ساقعة
عشمها كتير و اهو خلي بيها
أيام بتفوت قاعدة حزينة
عايش أهو عادي بيتسلى
واهي قاعدة وحيدة وتعيسة ...

بوشوش الودع
وبضرب الحجر
واقولك يا جدع
ايش هو اللي جرى
كان لك زمان حلوة
ليها خدود حمرا
تسكر زمان فيهم
ليها عيون ساحرة
تسحر اوام بيهم
ليها كفوف ناعمة
وتطيب جروحك
ليها قلب ابيض
كله براح وحنان
بس انت ليه قاسي
ازاي كده هاجرها
وسايبها وفاجعها

مفطورة مكسورة

زى الوليد لما

يصرخ من الوحدة

يا تروح وتجيرها

يا تسبها وتفارق

بقولك يا جدع

ما تضرب الودع .

.....

دعسوقة فرحانة بخفتها

تتمايل وتقول يا حيلتها

دايمًا تتلام على برائتها

والكل يقول يا حلاوتها

لابسة توب أسود ومنقط

قلبها لونه أبيض ومنور

بها دعسوق ابن الباشا

وبقت حكايتهم دى حكاية

حاولوا يتخطوا حواجزهم

لكن الدنيا منعتهم

حلفت ما هتهدى وتسبهم

يمشوا ويكملوا قصتهم...

.....

كانت الضحكة تملي

ماليه وشك البرئ

كانوا يمشوا يقولوا عنك

الحياة فاتحة دراعتها ليها

عكس ما قفله لنا

ابتسامتك أو شقوتك

فيكي شئ يمكن غريب

ناس شافوكي .. حاسوا فيكي

حلم ضاع وياه الزمان

قالوا عنك ابتسامتك

تملى كل الكون امان

شافوا فيكي نص مشرق

طاغي ع النص الحزين

نص حاجة في كل حاجة

نص عايشة بنص قلب.

.....

لسه عايشة بنص قلب
حاسبة حب الدنيا كله
في نص قلب
نص قلب ونص عقل
ع الميزان متكايلين
حاسبة كل حاجة بتعملها
ناسية شيء اسمه النصيب.

.....

إلى الشخص اللي سبني وحيدة فالدنيا
وقالي كتير أنا جمبك ومش سايبك
أنا حبيبك وطول الوقت هكون سندك ...
إلى الشخص اللي عشمي وخلا بيا
رسملي الدنيا بالألوان وطلعت فالأساس أسود ...
إلى الشخص اللي حبيته وكل مشاعري أديته ...
إلى الدنيا اللي ثبتتلي محدش فيها يستاهل ...
إلى الدبلة اللي مرمية في درج المكتب الأول ...
إلى الوردة اللي دبلانة في قلب رواية ونسيتها ...
إلى دفتر حكاياتي وكل حكاية عليك أنت ...
إلى نفسي خلاص فوقني ده سابك من زمان أصلاً نساكي
حبيبك الغالي وعاش حياته من غيرك.

.....

اتغيرنا احنا الاتنين

مش عيب فينا ولا حاجة

ولا بعيتنى ولا بعتك

ولا خنتينى ولا خنتك

بس احنا معدناش واحد

ولا بقى فى حاجة بقت بينا

فى مليون حاجة اتكسرت

جواكى قبل ما تبدأ

وانا مبقتش عارف أعيش

بوجودك أو بغيابك

مش عارف ايه اللى جرلنا!

ولا عارف كنا زمان فين؟

بس أنا عارف دلوقتى

أن أنا مش عارف امشى.

.....

بتتلكك عشان تبكى
وتبكى لما تتألم
فتتالم الم موجوع
وجع جواه حلاوة روح
تروح لمكانها من تانى
وتانى الدمعة دى مبتجيش
تجيش نساها ونطنش
طناش الحب للمساكين
فمسكين اللى قلبه حزين وميخيش.
.....

وليه الناس يلوموني
وانا عايشة فهاك انت
وليه دايمًا يقولولي
سبيه مرة هيرجعلك كتير لسه
وليه عادى يضايقوني
منا ممكن اضايقهم
وليه اصلا يعبونني
وهو الحب ليه اصلا كده خنقهم
وليه !! ما اللي اختشوا ماتوا
فوقت الحزن وسابوني
وليه لما اتقالتلى بحبك
كتير جدا من الناس دي حسدونني.

.....

عيونك ليه بتدبحنى

وليه دايمًا تعذبنى

وليه بالذنب تحسسنى

واه منك واه منى

ما هو انت اللى هنا ساينى

وهاجرنى!!!

وتحلف ميت يمين

بانك مش الغلطان ولا الندمان

وتتدم ليه ؟؟

ما هو ندمك مراش يفيد

وخذ بالك هقولك كلمتين سهلين

ضميرك مات ..

وقلبك زيه برده تمام

وانا قلبى م راح ينسى

ولا يصفى

وكل دقيقة واحدة تمر

راح أدعيلك مش ادعى عليك

عشان تعرف وتتأكد

خسارة انا فيك.

.....

مش عادى انك تخون
انك تبيع انك تسيب
مش عادى انك تعشم
قلب ابيض لسه فاضى ...
مش عادى ومش طيعى
تدى نفسك حق مش مكتوب باسمك
مش عشان انك ولد
يبقى عادى ترتبط ...
طب يا سيدى ارتبط
بس هي وردة بيضة مفتحة
زى نور الشمس صافية مشقشقة.

.....

المطبعة الرابعة

ما بين الآه والتنهيدة
في مليون كلمة متحاشة
في مليون نظرة مكسورة
في مليون حاجة موجوعة
ما بين نفسي وبين نفسك
طرق متفككة جداً
جروح مرمية كده بالكوم
اجي أوصلك أتوه منك
تجي انت .. متوصلنيش..
نتوه من بعض فالزحمة
ما بين مولد وبين حادثة
تضيع الآه كمان منه
ونرجع تاني نتهد..
ما بين الآه والتنهيدة

في مليون كلمة متحاشة

متخرجش فتوجعني

وتحلف ليلة ماتسبني

تعشمني في يوم نرتاح

ونتصالح ..

تعافر هي وأعافر

عشان الآه متوجعشي

وتخرج عادي وتسبني ..

.....

قلم مكسور

قلم جواه جروح بالكوم

قلم ورصاصه ده يموت

قلم مكسور وييجرح

قلم و بيتبرى م الهم

قلم ده المستخبي يغم

قلم و بيدي لون واحد

قلم و مسيره يوم يخلص

قلم وفى ضهره استيكة

قلم وييمسح الماضي

قلم ولوحده فالعلبة

قلم وحزين من الدنيا ..

.....

ورا كل كلمة مش عايزة حاجة
ميت سؤال وميت إجابة
ورا كل كلمة مش عايزة حاجة
بكون ساعتها فى أشد الحاجة
ورا كل رفض و عدم استجابة واه
جواهم مليون استغاثة
ورا كل ذل وكسرت كرامة
انسان حزين محتاج لابتسامة
ورا كل نظره سكوت كلام
محبوس ف نينى خايف ينام
وان جيت اعبر تقلب خناقه ومعرکه
لو اقول ادارى تخاصمنى نفسي المرهقة
وحاجات كتير محتاجه صبر وتكتكه
من غيرك انت بكون ضعيفه مشتته.

.....

متزعليش

اكن واحد قالك انتي متفعيش

ف متزعليش

لو جم قالوك انه باعك ميهمكيش

وان حاولوا يوم يانبوكي متركزيش

هيحاول انه يوجعك ف هيجرك

متسلميش

وان جه وقالك انه حبك

وانه نادم ع اللي متصدقيش

اصله لو كان يومها حب

كان فضل ومكنش ساب.

.....

هو انتى ازای قادیرة تكونى كده

قادیرة متفرحیش كل ده

حابسة نفسك جواه نفسك

جواه خوفك واياه ضعفك

سایبة ناسك ناسیة روحك

المهم تعیشى حزنك

ضایعة تايه فى ماضیکى

ماضى علم جرحه فیکی

حالفه انك تاخذى تارك

حتى لو هتضیع سنینك.

.....

بتوه ف التوه ميت مرة
وآبص لنفسى من برا
بنادى لروحى من فترة
وبحلم حلم انا لبكرة
وبرجع تانى متيين خطوة
يجوز عقلى ناقص فكرة
ف توه عاشروميت مرة
وآبص لنفسى من برا
وفكر روحى بروح حرة
وقسم حلمى كذا فقرة
واكسر خوفى من جوا
وابدا خطوة ورا خطوة.

.....

انا اسفة يا نفسى خلاص
انا اللى عملت كده فيا
رمىت كل كلام الناس
وقلت حرام سيبوه ليا
كتير قالوا خدى بالك
ومتامنيش ده هيبيعك
هيتمكن قوام منك
وياخد قلبك الأبيض
عشان يملاه بقع سودا..
لكن ولا مرة انا صدقت
ولا حببت أصدق هم
عشان شايفك ملاك ابيض
غير الوحش المتخفي
يارتنى كنت يومها مشيت
ولا استتيت ..
يا ريت نظرى ما كان خانى
يا ريت اصلا مكنتش جيت .

برغم أن انت شئ بارد
وقلبك ده كيان غامض ،
وحبك كل يوم ييموت ،
واحساسك بشئ غيرك
ده مش موجود !!
برغم الذل و الكسرة
وقهرة قلبى الموجوع
مفكرتش فى يوم أبعد
عشان معرفش غير أفضل
واموت م الوحدة ميت مرة
ولا مرة ابينلك فى يوم واصرخ
ويصرخ قلبى جوايا
وعقلى يقول كده كفاية
وأقول انا بكرة لازم افوق
وأعيد حساباتي من تاني
لكن بكرة بيتأخر
وأكون أنا قاعدة زى الوقتي بستتى.

إختار بجد

إختار وحب الإختيار

إختار وعيش كل الحياة

فإختار تعيش

إختار تكون زى الحمام

بجناح وطير

إختار وكون حر وطلق

إختار وحب من الصميم.

.....

حبي جسمك
حبي شكاك
حبي روحك
لون عيونك
حبي قلبك
حبي ضحكك
واضحكي وانسي الهموم
حبي شغلك
حبي أهلك
حبي كل الناس كمان
حبي عقلك
والجنان وياه كمان
حبي قد ما تقدرى
حبي وانسي الحب ايه ...

.....

عم ابراهيم

راجل فخيم

عنده بنات

وڪمان بنين

راجل امين

وزنه سمين

يأكل لحوم

محشي وڪباب

يأكل سمك

وڪمان حمام

عم ابراهيم

هاجر زمان

ساب قريته

وراح للزحام

شاف م الوشوش

أشكال ألوان

عاش وسط عيلته

راجل تمام

كبروا العيال

واتجوزا

ولا حد فيهم

كان زى ابوه

راجل اصيل

راجل تمام

عم ابراهيم

مات وادفن.

.....

واحد وواحدة اتجوزوا
و م العيال .. خالفوا
جابوا الولد وياه البنات
ربوا سنين وكبروا
وفي وسط دوشة اتفرقوا
يومها ابوهم تاه واختفى
فالزحمة ضاع وياه الهوا
يومها العيال اتشتتوا
جوا اوضهم يهربوا...
لو كان ابوهم وسطهم
وماكنش باعهم وقتها
كانوا العيال فرحت اوي
م الفرحة يجروا يتتطاطوا ...



مزاآ الكؤب
للفشر و الفؤزفم

آ.م.ع

Email: mazajelkotob@gmail.com

Mobile: 01024541339

